



15. oktober - 2024

UKA2024/48

### **Piniarneq aallaaniarnerlu pillugit Inatsisartut inatsisaata allanngortinnissaa pillugu Inatsisartut inatsisaat**

(Akiliisitsilluni aallaaniarnermik aaqqissuussisartunut najugaqartussaataitanermit piunasaqaatip ukiunit marlunniit ukiunut tallimanut sivitsorneqarnera kiisalu akuersissummik qinnuteqarnermi immikkut ittumik akuersinissamut malittarisassat nutarterneqarnerat, kiisalu akuersissummik qinnuteqarnermi immikkuullarissumik najugarisaq pillugu uppersaasiinissamik erseqqissaaneq)

Siullermik Siumumiit Naalakkersuisut Piniarneq aallaaniarnerlu pillugit inatsisip allanngortinnissaa pillugu saqqummiinerannut qutsavigaagut imatullu oqaaseqaateqassalluta:

Piniarneq Aallaaniarnerlu pillugit Inatsisartut Inatsisaat UKA 2022-mi imm 130-ip oqaluuserinerani sammiviit ilaattut nangitsinertut una Inatsisartut inatsisaata allanngortinnissaa taasinnaavarput

Akiliisitsilluni aallaaniarnermik aaqqissuussisartoqarnerup sapinngisamik nunatsinni najugaqavissuniit ingerlanneqartarnissaa, aammalumi piffimmini ilisimasaminnik piniartitaminnut assigiinngitsutigut sullitaminnut immersuilluartarnissaat piusassasoq naatsorsuutigalugu aammalumi taamatut piniartitsisarnermi aningaasat piffimmi kaavisinneqartarnissaata pingaassusaat eqqaallugu taamatut inatsimmi allannguniarneq tunngaviatigut tamakkiisumik Siumumiit taperserluigu oqaatigissavarput

Akiliisitsilluni aallaaniarnermik aaqqissuussisartutut ingerlataqartunut kiisalumi taamatut ingerlataqalerumaartussanut inatsisikkut najugaqartussaataitanerup, aammalumi inuit nalunaarsorsimaffianni akileraartussaataitanikkullu ukiunut tallimanut piunasaqaateqalernissaq nunatsinni najugaqavissunut iluaqusiiffiussasoq tunngaviatigut takusinnaallugulu qulakkeerinniffiusaammaat iluarisimaarlutigu

Iluarisimaarlugulu immikkut taarusupparput; tusarniaanermi akissutit ilaatigut aallaavigalugit inatsisissaq nalimmarsarfigineqarsimammat soorlu, 50/50-imik isertitaqartussaataitanerup ilaatigut tusarniaanermi akissuteqartut uparuarsimasaat eqqarsaatigalugu maluginiarparput inatsisissami allaqqanera peerneqarsimasoq, tamanna tunngaviatigut iluarisimaarparput tassami tamatumunnga siunertamut soqutiginnittunut aporfiliisutut ilaatigut tusarniaanermi akissutaasut takutimmasuk piffikkaartumik sumi najugaqarneq aallavigaanni piniartitsisartut periarfissaat assigiinngissinnaasartut ilisimavagut, soorlu Umimmanniartitsisarnermi piffiit ilaanni killilersuisoqarpallaanngitsoq, piffiit ilaanni pisassat pisassiisutaasut amerlasuutut



taaneqarsinnaanngitsut piusarmata, taamaasillunilu tupinnanngitsumik piffimmi innuttaasut neqinnannissaat salliutinneqartarpoq taamaasillunilu aallaaniarnermik ingerlatsisartut periarfissaat piuvallaarunnaartarluni, kisiannili piniagassatigut allatigut piniartitsisinnaanerit eqqumaffigineqarlutik periarfissarsiuunneqartarnerat piosoq tunngaviatigut iluarisimaarparput, tamatumunngalu ilutigitillugu sapinngisamik piniartiitsisartut periarfissaasa tapersortuarnissaat pisariaqartutut isigaarput, tassami ilaatigut mittarfissuit tamakkiisumik atulerpata qularnanngitsumik suli nittarsaassilluarnikkut periarfissap taassumap takornarianiit atornerarnerulersinnannerat takusinnaalluaratsigu

Inuutissarsiornikkut akiliisitsillunilu piniartitsisarnikkut pissarsissutaasinnaasut nunatta piinik periarfissiisut innuttaasunit tamakkiisumik ingerlanneqartarnissaat aqquutissaasariaqartutut isigaarput, taamaattumillu inatsisip allanngortinnissaa pillugu siunnersuut ilalerlutigu

Ilanngulluguttaaq erseqqissaateqarusuppugut, tassa Akiliisitsilluni aallaaniarnermik ingerlatsissagaanni piunasaqaataasariaqarmat pineqartup piniuteqartussaana, aammalu atortutigut ismannaallisaanikkullu ullutsinnut naleqquttunik siammasissumik atortuuteqarnissaata pingaaruteqarnera matumuuna naqissuserusullutigu

Ilanngulluguttaaq pingaartutut isigaarput piniartitsineri piniakkap pisarineqartup tamakkiisumik tikiunneqartarnissaa pisariaqarmat, ilaatigut ilisimaneqarmat pisaq tamakkerlugu tikiunneqartanngitsoq, naak tikiunneqaruni qularnanngitsumik neqi piffimmut innuttaasunut aamma iluaqutaasumik pisinnaagaluortoq

Piniartitsisarnermut akuersissutit avataaneersunit pigineqartut ilanngullugit ataatsimiititaliami qulaajaavigineqarnissaat kissaatigaarput, akuersissutit qanoq ukiunut qassinut siarsimanersut tamakkiisumik assilianngorlugit ilisimaneqartariaqarmata

Taamatut oqaaseqarluta Inatsisissatut siunnersuut ilalerlugu aammalumi ataatsimiititaliami sammineqarsinnaasut ilanngullutigit, ataatsimiititaliamut aalisarnermut piniarnermut nunalerinermullu ingerlateqqipparput, ataatsimiititaliaq sulilluarnissaanik kissaallugu

Jens Kristian Therkelsen, Siumut